







後錄卷之一

北學報學類之推言

所定四庫全書輯別錄訂條明以經好

顏氏家訓略

序攷纂

夫聖賢之書教人誠然慎言慎行立身處事

已將大綱目以爲所著者中世金鑑後世

聖賢之書教人誠然慎言慎行立身處事







穀詒彙卷之一

北齊琅瑯顏之推著

男男正言校

明滇南陶希臯輯 男珙訂 孫男

以錫以鑄督梓

顏氏家訓略

序致篇

夫聖賢之書教人誠孝。慎言簡迹。立身揚名。亦  
已備矣。魏晉以來。所著諸子。理重事複。遞相模  
倣。猶屋下架屋。牀上施牀耳。吾今所以復爲此



者。非敢軌物範世也。業以整齊門內。提撕子孫。夫同言而信。信其所親。同命而行。行其所服。禁童子之暴謔。則師友之誠。不如傳婢之指揮。止凡人之鬪鬩。則堯舜之道。不如寡妻之誨諭。吾望此書爲汝曹之所信。猶賢於傳婢寡妻耳。

教子篇

上智不教而成。下愚雖教無益。中庸之人。不教不知也。古者聖王有胎教之法。懷子三月。出居



別宮。目不邪視。耳不妄聽。音聲滋味。以禮節之。  
書之玉版。藏諸金櫃。子生咳呿。師保固明。仁智  
禮義。導習之矣。凡庶縱不能爾。當撫嬰稚。識人  
顏色。知人喜怒。便加教誨。使爲則爲。使止則止。  
比及數歲。可省笞罰。父母威嚴而有慈。則子女  
畏慎而生孝矣。吾見世間無教而有愛。每不能  
然。飲食運爲。恣其所欲。宜誠翻獎。應訶反笑。至  
有識知。謂法當耳。驕慢已習。方復制之。捶撻至



死而無威。忿怒日隆而增怨。逮于成長。終爲敗德。孔子云。少成若天性。習慣如自然。是也。俗諺曰。教婦初來。教兒嬰孩。誠哉斯語。

父子之嚴。不可以狎。骨肉之愛。不可以簡。簡則慈孝不接。狎則怠慢生焉。由命士以上。父子異宮。此不狎之道也。抑搔癢痛。懸衾篋枕。此不簡之教也。

人之愛子。罕亦能均。自古及今。此弊多矣。賢俊



者自可賞愛。頑魯者亦當矜憐。有偏寵者。雖欲以厚之。更所以禍之。共叔之死。母實爲之。趙王之戮。父實使之。劉表之傾宗覆族。袁紹之地裂兵亡。可爲靈龜明鑒也。

### 兄弟篇

夫有人民而後有夫婦。有夫婦而後有父子。有父子而後有兄弟。一家之親。此三而已矣。自茲以往。至于九族。皆本於三親焉。故於人倫爲重。



者也。不可不篤。兄弟者分形連氣之人也。方其  
幼也。父母左提右挈。前襟後裾。食則同案。衣則  
傳服。學則連業。遊則共方。雖有悖亂之人。不能  
不相愛也。及其壯也。各妻其妻。各子其子。雖有  
篤厚之人。不能不少衰也。娣姒之比兄弟。則踈  
薄矣。今使踈薄之人。而節量親厚之恩。猶方底  
而圓蓋。必不合矣。唯友悌深至。不爲傍人之所  
移者。免夫。



二親旣歿。兄弟相顧。當如形之與影。聲之與響。愛先人之遺體。惜已身之分氣。非兄弟何念哉。兄弟之際。異於他人。望深則易怨。他親則易弭。譬猶居室。一穴則塞之。一隙則塗之。則無頽毀之慮。如雀鼠之不卹。風雨之不防。壁陷楹淪。無可救矣。僕妾之爲雀鼠。妻子之爲風雨。甚哉。兄弟不睦。則子姪不愛。子姪不愛。則羣從䟽薄。羣從䟽薄。則僮僕爲讐敵矣。如此則行路皆跼。



其面而蹈其心。誰救之哉。人或交天下之士。皆有歡愛。而失敬於兄者。何其能多而不能少也。人或將數萬之師。得其死力。而失恩於弟者。何其能踈而不能親也。

娣姒者多爭之地也。使骨肉居之。亦不若各歸四海。感霜露而相思。佇日月之相望也。況以行路之人。處多爭之地。能無間者鮮矣。所以然者。以其當公務而執私情。處重責而懷薄義也。若



能恕已而行。換子而撫。則此患不生矣。

### 後娶篇

吉甫賢父也。伯奇孝子也。賢父御孝子。合得終於天性。而後妻間之。伯奇遂放。曾參婦死。謂其子曰。吾不及吉甫。汝不及伯奇。王駿喪妻。亦謂人曰。我不及曾參。子不如華元。並終身不娶。此等足以爲誡。其後假繼慘虐孤遺。離間骨肉。傷心斷腸者。何可勝數。慎之哉。慎之哉。



治家篇

夫風化者。自上而行於下者也。自先而施於後者也。是以父不慈則子不孝。兄不友則弟不恭。夫不義則婦不順矣。父慈而子逆。兄友而弟傲。夫義而婦陵。則天之凶民。乃刑戮之所攝。非訓導之所移也。咎怒廢於家。則豎子之過立見。刑罰不中。則民無所措手足。治家之寬猛。亦猶國焉。孔子曰。奢則不遜。儉則固。與其不遜也。寧固。



又云雖有周公之才之美。使驕且吝。其餘不足觀也已。然則可儉而不可吝也。儉者省約爲禮之謂也。吝者窮急不卹之謂也。今有奢則施。儉則吝。如能施而不奢。儉而不吝。可也。

世間名士。但務寬仁。至於飲食饗饋。僮僕減損。施惠然諾。妻子節量。狎侮賓客。侵耗鄉黨。此亦爲家之巨蠹矣。

婦主中饋。唯事酒食衣服之禮耳。國不可使預



政家不可使幹蠱。如有聰明才智。識達古今。正當輔佐君子。助其不足。必無牝雞晨鳴。以致禍也。

婚姻素對。靖侯成規。近世嫁娶。遂有賣女納財。買婦輸絹。比量父祖。計校鎗銖。責多還少。市井無異。或猥婿在門。或傲婦擅室。貪榮求利。反招羞耻。可不慎歟。

借人典籍。皆須愛護。先有缺壞。就爲補治。此亦



士大夫百行之一也。濟陽江祿讀書未竟。雖有  
急速。必待卷束整齊。然後得起。故無損敗。人不  
厭其求假焉。或有狼籍几案。分散部帙。多爲童  
幼婢妾之所點汙。風雨犬鼠之所毀傷。實爲累  
德。吾每讀聖人之書。未常不肅敬對之。其故紙  
有五經詞義。及賢達姓名。不敢穢用也。  
吾家巫覡禱請。絕於言議。符書章醮。亦無祈焉。  
並汝曹所見也。



風操篇

昔者周公一沐三握髮。一飯三吐餐。以接白屋之士。一日所見七十餘人。晉文公以沐辭豎頭。須致有圖反之誚。門不停賓。古所貴也。失教之家。閤寺無禮。或以主君寢食嗔怒。拒客未通。江南深以爲耻。黃門侍郎裴之禮號善爲士大夫。有如此輩。對賓杖之。其門生僮僕。接於他人。折旋俯仰。辭色應對。莫不肅敬。與主無別也。



# 慕賢篇

古人云千載一聖。猶旦暮也。五百年一賢。猶比  
膊也。言聖賢之難得。疏闊如此。儻遭不世明達  
君子。安可不攀附景仰之乎。人在少年。神情未  
定。所與款狎。熏漬陶染。言笑舉動。無心於學。潛  
移暗化。自然似之。何況操履藝能。較明易習者  
也。是以與善人居。如入芝蘭之室。久而自芳也。  
與惡人居。如入鮑魚之肆。久而自臭也。墨翟悲



於染絲。是之謂矣。君子必慎交遊焉。孔子曰。無  
友不如己者。顏閔之徒。何可世得。但優於我。便  
足貴之。世人多蔽貴耳。賤目。重遙輕近。少長周  
旋。如有賢哲。每相狎侮。不加禮敬。他鄉異縣。微  
藉風聲。延頸企踵。甚於饑渴。校長短。覈精麤。或  
彼不能如此矣。所以魯人謂孔子爲東家丘。昔  
虞國宮之奇。少長於君。君狎之。不納其諫。以至  
亾國。不可不留心也。用其言棄其身。古人所耻。



凡有一言一行。取於人者。皆顯稱之。不可竊人之美。以爲己力。雖輕雖賤者。必歸功焉。竊人之財。刑辟之所處。竊人之美。鬼神之所責。

### 勉學篇

自古明王聖帝。猶須勤學。況凡庶乎。此事遍於經史。吾亦不能鄭重。聊舉近世切要。以終寤汝耳。士大夫子弟。數歲已上。莫不被教。多者或至禮傳。少者不失詩論。及至冠婚。體性稍定。因此



天機。倍。須。訓。誘。有。志。尚。者。遂。能。磨。礪。以。就。素。業。  
無。履。立。者。自。茲。墮。慢。便。爲。凡。人。人。生。在。世。會。當  
有。業。農。民。則。計。量。耕。稼。商。賈。則。計。論。貨。賄。工。巧  
則。致。精。器。用。伎。藝。則。深。思。法。術。武。夫。則。慣。習。弓  
馬。文。士。則。講。議。經。書。多。見。士。大。夫。耻。涉。農。商。羞  
務。工。伎。射。旣。不。能。穿。札。筆。則。纔。記。姓。名。飽。食。醉  
酒。忽。忽。無。事。以。此。銷。日。以。此。終。年。或。因。家。世。餘  
緒。得。一。階。半。級。便。謂。爲。足。安。能。自。苦。及。有。吉。凶。



大事。議論得失。蒙然張口如坐雲霧。公私宴集。談古賦詩。塞默低頭。欠伸而已。有識傍觀。代其入地。何惜數年勤學。長受一生愧辱哉。

夫所以讀書學問。本欲開心明目。利於行耳。未知養親者。欲其觀古人之先意承顏。怡聲下氣。不憚劬勞。以致甘腴。惕然慚懼。起而行之也。未知事君者。欲其觀古人之守職無侵。見危授命。不怠誠諫。以利社稷。惻然自念。思欲效之也。素



驕奢者。欲其觀古人之恭儉節用。卑以自牧。禮  
爲教本。敬者身基。瞿然自失。斂容抑志也。素鄙  
恪者。欲其觀古人之貴義輕財。少思寡慾。忌盈  
惡滿。賙窮卹匱。赧然悔耻。積而能散也。素暴悍  
者。欲其觀古人之小心黜已。齒敝舌存。含垢藏  
疾。尊賢容衆。繭然沮喪。若不勝衣也。素怯懦者。  
欲其觀古人之達生委命。強毅正直。立言必信。  
求福不回。勃然奮厲。不可恐懼也。歷茲以往百。



行皆然。縱不能淳。去泰去甚。學之所知。施無不達。世人讀書。但能言之。不能行之。武人俗吏。所共嗤詆。良由是耳。又有讀數十卷書。便自高大。凌忽長者。輕慢同列。人疾之如讎敵。惡之如鴟梟。如此以學求益。今反自損。不如無學也。

### 文章篇

夫文章者。原出五經。詔命策檄。生於書者也。序述論議。生於易者也。歌詠賦頌。生於詩者也。祭



祀哀誅。生於禮者也。書奏箴銘。生於春秋者也。朝廷憲章。軍旅誓誥。敷顯仁義。發明功德。牧民建國。施用多途。至於陶冶性靈。從容諷諫。入其滋味。亦樂事也。行有餘力。則可習之。然而自古文人多陷輕薄。屈原露才揚已。顯暴君過。宋玉體貌容冶。見遇俳優。東方曼倩滑稽不雅。司馬長卿竊貲無操。王褒過章童約。楊雄德敗美新。李陵降辱夷虜。劉歆反覆莽世。傅毅黨附權門。



班固盜竊父史。趙元叔抗竦過度。馮敬通浮華  
擯壓。馬季長佞媚獲誚。蔡伯喈同惡受誅。吳質  
詆訶鄉里。曹植悖慢犯法。杜篤乞假無狀。路粹  
監狹已甚。陳琳實號龕疎。繁欽性無檢格。劉禎  
屈強輸作。王粲率躁見嫌。孔融禰衡誕傲致殞。  
楊修丁廙扇動取斃。阮籍無禮敗俗。嵇康凌物  
凶終。傅玄忿鬪免官。孫楚矜誇凌上。陸機犯順  
履險。潘岳乾沒取危。顏延年負氣摧黜。謝靈運



空疎亂紀。王元長。凶賊自貽。謝玄暉。悔慢見及。凡此諸人。皆其翹秀者。不能悉紀。大較如此。至于帝王。亦或未免。自昔天子而有才華者。唯漢。魏。太祖。文帝。明帝。宋。孝武帝。皆負世議。非懿德之君也。自子游子夏。荀況。孟軻。枚乘。賈誼。蘇武。張衡。左思之儔。有盛名而免過患者。時復聞之。但其損敗居多耳。每嘗思之。原其所積。文章之體。標舉興會。發引性靈。使人矜伐。故忽於持。



操果於進取。今世文士。此患彌切。一事愜當。一句清巧。神厲九霄。志凌千載。自吟自賞。不覺更有傍人。加以砂礫所傷。慘於矛戟。諷刺之禍。速乎風塵。深宜防慮。以保元吉。

學問有利鈍。文章有巧拙。鈍學累功。不妨精熟。拙文研思。終歸蚩鄙。但成學士。自足爲人。必乏天才。勿強操筆。吾見世人。至於無才思。自謂清華。流布醜拙。亦以衆矣。江南號爲吟癡符。



名實篇

名之與實。猶形之與影也。德藝周厚。則名必善焉。容色姝麗。則影必美焉。今不脩身。而求令名於世者。猶貌甚惡。而責妍影於鏡也。上士忘名。中士立名。下士竊名。忘名者體道合德。享鬼神之福祐。非所以求名也。立名者脩身慎行。懼榮觀之不顯。非所以讓名也。竊名者厚貌深姦。干浮華之虛稱。非所以得名也。



人足所履。不過數寸。然而咫尺之途。必顛蹙於崖岸。拱抱之梁。每沉溺於川谷者。何哉。爲其傍無餘地故也。君子之立已。抑亦如之。至誠之言。人未能信。至潔之行。物或致疑。皆由言行聲名無餘地也。吾每爲人所毀。常以此自責。若能開方軌之路。廣造舟之航。則仲由之言信。重於登壇之盟。趙喜之降城。賢於折衝之將矣。

涉務篇



大君子之處世。貴能有益於物耳。不徒高談虛論。左琴右書。以費人君祿位也。國之用材。大較不過六事。一則朝廷之臣。取其鑒達治體。經綸博雅。二則文史之臣。取其著述憲章。不忘前古。三則軍旅之臣。取其斷決有謀。強幹習事。四則藩屏之臣。取其明練風俗。清白愛民。五則使命之臣。取其識變從宜。不辱君命。六則興造之臣。取其程功節費。開略有術。此則皆勤學守行者。



所能辨也。人性有長短。豈責其美於六塗哉。但當皆曉指趣。能守一職。便無媿耳。

吾見世中文學之士。品藻古今。若指諸掌。及有試用。多無所堪。居承平之世。不知有喪亂之禍。處廟堂之下。不知有戰陣之急。保俸祿之資。不知有耕稼之苦。肆吏民之上。不知有勞役之勤。故難可以應世經務也。

### 省事篇



銘金人云。無多言。多言多敗。無多事。多事多患。至哉斯戒也。能走者奪其翼。善飛者減其指。有角者無上齒。豐後者無前足。蓋天道不使物有兼焉也。古人云。多爲少善。不如執一。鼯鼠五能。不成伎術。

君子當守道崇德。蓄價待時。爵祿不登。信由天命。須求趨競。不顧羞慙。比較材能。斟量功伐。厲色揚聲。東怨西怒。或有劫持。宰相瑕疵。而獲酬



謝。或有誼聒時人視聽。求見發遣。以此得官。謂  
爲才力。何異盜食致飽。竊衣取溫哉。世見躁競  
得官者。便爲弗索何獲。不知時運之來。不然亦  
至也。見靜退未遇者。便爲弗爲胡成。不知風雲  
不與。徒求無益也。凡不求而自得。求而不得者。  
可勝算乎。

止足篇

禮云。欲不可縱。志不可滿。宇宙可臻其極。情性



不知其窮。唯在少欲知止。爲立涯限。爾先祖靖侯戒子姪曰。汝家書生門戶。世無富貴。自今仕宦。不可過二千石。婚姻勿貪勢家。吾終身服膺。以爲名言也。

天地鬼神之道。皆惡滿盈。謙虛冲損。可以免害。人生衣取以覆寒露。食取以塞饑乏爾。形骸之內。尚不得奢靡。已身之外。而欲窮驕泰耶。周穆王秦始皇漢武帝。富有四海。貴爲天子。不知紀



極猶自敗累。况士庶乎。常以爲二十口家。奴婢盛多。不可出二十人。良田十頃。堂室纔蔽風雨。車馬僅代杖策。蓄財數萬。以擬吉凶急速。不啻此者。以義散之。不至此者。勿非道求之。

### 養生篇

夫養生先須慮禍。全身保性。有此生然後養之。勿徒養其無生也。單豹養於內而喪外。張毅養於外而喪內。前賢所戒也。嵇康著養生之論。而



以傲物受刑。石崇冀服餌之徵。而以貪溺取禍。  
往世之所述也。

夫生不可不惜。不可苟惜。涉險畏之途。于禍難  
之事。貪欲以傷生。讒慝而致死。此君子之所惜  
哉。行誠孝而見賊。履仁義而得罪。喪身以全家。  
泯軀而濟國。君子不咎也。



柳公綽傳

公綽京兆華原人。世爲名家。十八登科第。雖少雋。乃性謹重。動循禮法。嘗爲京兆尹。神策軍校衝導杖之。帝怒。召詰責。對曰。臣待罪京兆。而小校乃敢前唐突。此輕陛下法。非慢臣。臣知杖無禮者耳。不知爲神策校也。帝曰。何不奏。對曰。臣職當杖之。不當奏。帝退。謂左右曰。汝曹須避柳京兆。吾憚之矣。有此風力家居當何如氣燄。轉吏侍郎。遷御



史大夫。改尚書。出節度山南。

頗顯官

入爲刑尚書。

檢校左僕射。卒。贈太子太保。謚曰成。公綽天資

仁孝。丁母喪三年不沐浴。事後母薛謹甚。有爲

外婚姻者。壹不知非薛所生也。在公卿間。最名

有家法。非朝謁日。平旦輒出小齋。諸子皆束帶

晨省。公綽決私事。接賓客。與弟公權。及羣從弟。

再會。食皆不離小齋。自旦達暮。燭至。命子弟一

人讀經史一過。訖。及講議居官治家之法。或論



文或聽琴。至人定鍾。然後歸寢。子弟復昏定於中門。凡二十餘年。如一日也。歲饑。飯不過一食。諸子平時皆蔬食。曰。昔吾兄弟侍先君爲丹州刺史。以學業未成。不聽食肉。吾不忍忘也。姑姊妹姪有孤嫠者。雖踈遠。必擇婿嫁之。皆淡泊。曰。必待資裝豐備。何如嫁不失時。居外藩。子來省入境。郡邑未嘗知也。子仲郢端嚴好禮。起居一遵父法。事叔公權如事父。非甚病。見公權。未嘗



不束帶。出遇於路。必下馬端笏立。候過乃敢上。  
公權暮歸。必束帶迎馬前。公權屢以爲言。仲郢  
終不以官達故少改也。其爲京兆尹嚴。人莫敢  
犯。及爲河南尹寬。或問之曰。輦轂先彈壓。郡邑  
急惠養。各有當也。三爲大節鎮。廐無良馬。衣不  
薰香。私居未嘗不拱手。內齋未嘗不束帶。退公  
布卷。晝夜不捨也。境內有孤貧寡女。必爲選婿。  
出俸金嫁之。子珪璧皆登進士。珪蚤卒。璧至翰



學士諫大夫又子玘以蔭至御史大夫皆清直有父祖風公權綽之弟也舉進士累官河東郡公改太子少師卒贈太子太師亦直諫名德當世言家法者必歸柳氏云。

顏光衷曰觀柳氏家法知禮之可爲國也以此達之鄉推之國人人親其親長其長而天下平矣大抵風俗壞時自其子弟先做壞了好尊卑卑樂諂怒繩放縱敗檢甚者父兄只以聲色貨



利權。燄威寵。激其讀書志意。而猶自以爲善教也。一朝得志。其凌厲傲慢。能有極哉。善哉。柳玘之誠子弟也。而曰門弟高者。可畏不可恃也。知其可畏。而立身行已。增德惜福。教養子弟。達材利用。得志則澤及天下。不得志亦無愧其家庭。鬼瞰之而無隙。帝臨之而有當矣。于以綦昌綦熾。何有哉。



藍田鄉約

持身德業

一曰操行嚴正

凡人之一身。萬事根本。凡日用間。動止語默。須守禮法。勿縱其身於放逸。勿溺其志於淫邪。其身不正。則萬事皆不可行。此操行貴於嚴正也。

二曰用意忠厚



凡人局量器識。須要寬洪深厚。廓然有容。橫逆之至。非禮之加。受而消之。不介於懷。不得發人之陰私。不得譚人之過惡。勿稱量人之有無。勿妬忌人之勝已。然後謂之用意忠厚。

三曰持已謙恭

凡處已接物。須謙和遜順。禮以下人。卑以牧已。彼雖無禮。我則愈恭。守富貴而



若虛。蘊賢智而若愚。苟驕盈自足。則傾覆無日矣。此持已貴乎謙恭也。

四曰立心誠實

凡出言造行。務求始終表裏如一。不得巧飾以悅人。炫耀以欺世。與人謀事。必須盡忠相告。不得依違前却。陷人於罪惡。與人約信。必求合義。以踐其言。不得面從而背違。然後謂之立心誠實。



治家德業

一曰從孝敬

凡身之有。必本於祖宗父母。爲子孫者。於祖宗則立祠堂設神主。脩坟墓。祭享以時。務極誠敬。而不敢怠。於父母則左右奉養。承顏順志。不陷於不義。大則致其顯榮。次則不失其旨。又次不貽羞辱。孝敬旣立。則百行自此而生矣。



二曰篤恩義

凡爲兄當友其弟。弟當敬其兄。奉諸父當如已父。愛諸子當如已子。勿以財利間骨肉。勿以婦言傷和氣。苟家庭之間反唇側目。而求親厚於他人。無是理也。

三曰肅閨門

凡儀刑妻妾。當嚴正有禮。勿相戲狎。以來欺侮。勿偏寵愛。以生妬忌。勿私財利。



以起爭端。勿惑讒言。以亂家政。須深宮  
固門。以別其內外。秉燭擁面。以嚴其出  
入。

#### 四曰興禮教

凡子弟方其年幼之時。設家塾。延明師。  
讀書習禮。教其以少事長。以卑奉尊。至  
於洒掃應對。飲食起居之間。皆有矩度。  
毋得違越。世俗見幼子侮罵尊長。不忍



呵禁。反咲弄而獎之。至長習與性成。遂壞禮法。

五曰崇儉素

凡居家當安貧守分。慣清苦。甘淡薄。房屋取其內外深遠。不求雕飾。衣服取其完整。不求華麗。飲食取其充饑。不求甘旨。與凡交際饋送。皆以誠敬爲先。不必過求外飾。世之溺愛子弟者。每於襁褓



之中。衣以文綉。食以肥甘。任意所欲。皆爲之備。養成驕習。異日戕性喪生。傾家覆業。皆由如此。

### 六曰勤生業

凡居家之人。稻麻菽麥。蔬果竹木之類。有切於日用者。皆當用力種藝。至於牧養孽息。興販轉移之利。凡有助於家計者。皆當相時量力。以經營之。不得遊食。



素餐以墮家業。

七曰謹租賦

凡置田受產之家。必有戶役。如納糧當差。里甲供應之類。必須依期措辦。不得拖延。以取罪累。或畋他人之田。須要依期送納租稅。不得以影射拖欠。

處鄉德業

一曰慎交遊



凡友以輔德。必擇忠厚老成。博學知禮之士。庶可陶養德性。如或翻舌弄唇。遊手好閑。忌刻陰險。喜訟好爭之徒。切宜疏遠。

二曰廣施予

凡貧乏相周。約內已有義廩。或濟不給。而贏餘之家。又宜量力周給。勿責其報。或境內橋梁道路崩頽。相率募財脩造。



或他境脩砌橋道而募勸助力者亦宜量力施予。如或塑繪神像脩創寺觀與凡無益之費不必與之。

### 三曰解鬭爭

凡約內有因田園水利錢穀之類互相爭競許其各具本情始末開單赴社內告投約正從公判理量情議罰不許任氣角力互相鬭毆徑擾官司援引他辭。



以相羅織。違者約正。先具其是非真情。  
白諸官司以治之。

四曰明財利

凡鄉隣間田園叅錯。財穀往來。兩家必  
須公道明白。如甲之田。被乙所侵。甲必  
先自查究簿籍。自詣田所比照。及訪田  
鄰故老相同。然後親造乙家。乘間備陳  
首末。從容開示。如乙不從。又因乙之親



故。或直月爲之辨理。如再不從。然後具  
單。赴社告投。約正分判。不得任氣爭競。  
違者不論事之是非。先罰首爭之人。又  
如丙負丁之財物。丁當念貧家措置之  
艱。寬限聽其償還。勿太急迫。丙亦須念  
先前濟急之恩。極力措置以償。勿欺紿  
負約。反尋釁以讐乎丁。違者罰如甲乙。

五曰謹權量



凡交際財物。必資權量。以相關和。近世  
務得之人。如稱穀出入。方稱入之時。必  
謂生濕之故。而前一星以求盈。及支出  
之時。必謂消耗。而却二星以抵數。斗斛  
出入亦然。損德害人。莫甚於此。本社悉  
遵官降式樣。每戶給與量稱斗斛各一  
付。俱印官社二字爲別。均平通用。庶無  
紛爭。如有私自創立者。直月訪出。議以



重罰

六曰安分業

凡天地間萬物品彙。各有不齊。人當隨分而安。如造作用度之類。須量自己財力。不可勉強假貸。以求美觀。遂至傾墜。冠婚喪葬。悉照依文公家禮。及

國朝欽定上中下戶三等品制。上可該下。下不可援上。與凡賢愚貴賤。貧富大小。各有



分量。我之所有。不可肆志以相侵凌。我之所無。不可覬覦以生忌疾。

七曰睦親故

凡親戚故舊。世爲通家者。皆當盡誠相接。務得其心。非有大故。不得以讒言毀謗。輕相離絕。其所厚者薄。則無所不薄矣。

八曰敬耆老



比約內年七十以上者。同約之人。時加  
候問。每歲首。率備酒肉。以資饋養。或家  
貧。則助其布帛。及預爲之治其後事。勿  
令失所。

### 九曰重賢才

凡約內有稍知讀書績行。能敦古道。以  
厚風俗者。同鄉之人。加禮尊異。以彰其  
德。不得尋釁求全。更相排毀。以沮人爲



善之心。有願從學。而力不能自贍者。率財資之。期其成功。有科第而起者。衆共賀贈。以倡後人。

十曰崇禮遜

凡鄰里相接。必須謙遜和悅。少之事長。卑之奉尊。愈宜卑降。不得負勢凌人。恃財傲物。

十一曰正好尚



凡人正好尚。則邪無兩立之勢。如詩禮  
琴書。畊作樹藝。勉善戒惡。景慕正人。喜  
譚大道。此好尚之正者。博奕鬪訟。遊手  
傳餐。懷私立黨。忌疾正人。迷惑異教。此  
好尚之不正者。風俗興廢。實由於此。宜  
謹之。

十二曰重信義

凡鄰里相處。信義爲先。如與人期會。雖



忙冗必須赴期。甚有大故。亦須先期告謝。不得臨事背違。許人財物。必須應人之請。如不能給。不如莫許。受人寄托。必終其事。救人急難。勇於當先。勿以利先義。勿以私害公。

居官德業

一曰廉介

廉則貨不能奪。法介則威不能亂。政



二曰明決

明則無讒言。而聽德惟聰。決則無滯獄。而政事易理。

三曰勤慎

勤則施政無愆期。慎則處事無後艱。

四曰寬重

寬則舉動不迫。而下有所容。重則區畫不苟。而人不敢侮。



五曰忠信

忠則有愛人之實心。信則有處人之實  
行。



穀詒彙卷之二

滇南陶希臯輯男珙訂孫男以鈺以鑄

朱子家訓

附小學八則

父之所貴者慈也。子之所貴者孝也。君之所貴者仁也。臣之所貴者忠也。兄之所貴者愛也。弟之所貴者敬也。夫之所貴者和也。婦之所貴者柔也。事師長貴乎禮也。交朋友貴乎信也。見老者敬之。見幼者愛之。有德者年雖下於我。我必



尊之。不肖者年雖高於我。我必遠之。慎勿談人之短。切勿矜己之長。讐將以義解之。怨者以直報之。人有小過。含容而忍之。人有大過。以理而責之。勿以善小而不爲。勿以惡小而爲之。人有惡則掩之。人有善則揚之。處公無私讐。治家無私法。勿損人而利己。勿妬賢而嫉能。勿逞忿以報橫逆。勿非理以害物命。見不義之財。勿取。遇合義之事。則從。詩書不可不學。禮義不可不知。



子孫不可不教。奴僕不可不恤。守我之分者。理也。聽我之命者。天也。人能如是。天必相之。此乃日用常行之道。若衣服之於身體。若飲食之於口腹。不可一日無也。可不謹哉。

柳玘常著書戒其子弟曰。壞名災已。辱先喪家。其失尤大者五。宜深誌之。其一。自求安逸靡耳。澹泊。苟利於已。不恤人言。其二。不知儒術。不悅古道。懵前經而不耻論。當世而解頤。身既寡知。



惡人有學。其三勝已者厭之。俛已者悅之。唯樂  
戲談。莫思古道。聞人之善嫉之。聞人之惡揚之。  
浸漬頗僻。銷刻德義。簪裾徒在。廝養何殊。其四  
崇好優游。耽視麵藥。以啣盃爲高致。以勤事爲  
俗流。習之易荒。覺已難悔。其五急於名宦。匿近  
權要。一資半級。雖或得之。衆怒羣猜。鮮有存者。  
余見名門右族。莫不由祖先忠孝勤儉以成立。  
之。莫不由子孫頑率奢傲以覆墜之。成立之難。



升天覆墜之易如燎毛言之痛心爾宜刻骨  
白氏童蒙訓曰事君如事親事官長如事兄與  
同僚如家人待群吏如奴僕愛百姓如妻子處  
官事如家事然後能盡吾之心如有毫末不至  
皆吾心有所未盡也

張思叔座右銘曰凡言必忠信凡行必篤敬飲  
食必慎節字畫必楷正容貌必端莊衣冠必肅  
整步履必安詳居處必正靜作事必謀始出言



必顧行。常德必固持。然諾必重應。見善如已出。  
見惡如已病。凡此十四者。我皆未深省。書此堂  
座隅。朝夕視爲警。

范益謙座右戒曰。一不言朝廷利害。邊報差除。  
二不言州縣官員長短得失。三不言衆人所作  
過惡。四不言仕進官職。趨時附勢。五不言財利  
多少。厭貧求富。六不言淫媒戲嫚。評論女色。七  
言求覓人物。干索酒食。又曰。一人附書信不



可開折沉滯。二與人並坐。不可窺人私書。三凡  
入人家。不可看人文字。四凡借人物。不可損壞  
不還。五凡喫飲食。不可揀擇去取。六與人同處  
不可自擇便利。七見人富貴。不可嘆羨詆毀。凡  
此數事。有犯之者。足以見用意之不肖。於存心  
修身。大有所害。因書以自警。

呂舍人曰。大抵後生爲學。先須理會所以爲學  
者何事。一行一住。一語一默。須要盡合道理。學



業則須是嚴立課程。不可一日放慢。每日須讀一般經書。一般子書。不須多。只要令精熟。靜室危坐。讀取二三百遍。字字句句。須要分明。又每日須連前三五授。通讀五七十遍。須令成誦。不可一字放過也。史書每日須讀取一卷。或半卷以上。始見功。須是從人授讀。疑難處便質問求。古聖賢用心。竭力從之。夫指引者師之功也。行有不至。從容規戒者。朋友之任也。決意而往。則



須用已力。難仰他人矣。

呂氏童蒙訓曰。今日記一事。明日記一事。久則自然貫穿。今日辨一理。明日辨一理。久則自然浹洽。今日行一難事。明日行一難事。久則自然堅固。渙然氷釋。怡然順理。久自得之。非偶然也。孔戡於爲義。若嗜欲。不顧前後。於利與祿。則畏避退怯。如懦夫然。

呂正獻公。自少講學。卽以治心養性爲本。寡嗜



慾薄滋味。無疾言遽色。無窘步。無惰容。凡嬉笑  
俚近之語。未嘗出諸口。於世利紛華。聲伎遊宴。  
以至於博奕奇玩。淡然無所好。

### 柳氏家訓

予聞先君僕射言立已以孝悌爲基。恭默爲本。  
畏怯爲務。勤儉爲法。肥家以忍順。保交以簡恭。  
廣記如不及。求名如儻來。蒞官則潔已省事。而  
後可以言家法。又云受福則驕奢。歸奢則禍至。



故世族遠長。與名位豐約。不假問著龜星數。在處心行事而已。

陽明先生示憲兒

幼兒曹。聽教誨。勤讀書。要孝悌。學謙恭。循禮義。節飲食。戒遊戲。毋說謊。毋貪利。毋任情。毋鬪氣。毋責人。但自治。能容人。是大器。凡做人。在心地。心地好。是良士。心地惡。是兇類。譬樹果。心是蒂。蒂若壞。果必墜。吾教汝。全在是。汝諦聽。勿輕棄。



陽明先生示徐曰仁應試

君子窮達。一聽於天。但旣業舉子。便須入場。亦  
人事宜爾。若期在必得。以自窘辱。則大惑矣。入  
場之日。切勿以得失橫在胸中。令人氣餒志分。  
非徒無益。而又害之。場中作文。先須大開心目。  
見得題意大槩了了。卽放膽下筆。縱昧出處。詞  
氣亦條暢。今人入場。有志氣局促。不舒展者。是  
得失之念爲之病也。夫心無二用。一念在得。一



念在失。一念在文字。是三用矣。所事寧有成耶。  
只此便是執事不敬。便是人事有未盡處。雖或  
幸成。君子有所不貴也。將進場十日前。便須練  
習調養。蓋尋常不曾起蚤得慣。忽然當之。其日  
必精神恍惚。作文豈有佳思。須每日雞初鳴。卽  
起。盥櫛整衣端坐。抖擻精神。勿使昏惰。日日習  
之。臨期不自覺辛苦矣。今之調養者。多是厚食  
濃味。劇酣謔浪。或竟日齕卧。如此是撓氣昏神。



長傲而召疾也。豈攝養精神之謂哉。務須絕飲  
酒薄滋味。則氣自清。寡思慮。屏嗜慾。則精自明。  
定心氣。少眠睡。則神自澄。君子未有不如此而  
能致力於學問者。茲特以科場一事而言之耳。  
每日或倦甚思休。少偃卽起。勿使昏睡。旣晚卽  
睡。勿使久坐。進場前兩日。卽不得翻閱書史。雜  
亂心目。每日只可看文字一篇。以自娛。若心勞  
氣耗。莫如勿看。務在怡神適趣。忽克然滾滾。若



有所得。勿便氣輕意滿。益加含蓄醞釀。若江河之浸。泓衍泛濫。驟然決之一瀉千里矣。每日閑坐時。衆方囂然。我獨淵默。中心融融。自有真樂。蓋出乎塵垢之外。而與造物者游。非吾子槩嘗聞之。宜未足以與此也。

陽明先生諭俗四條

爲善之人。非獨其宗族親戚愛之。朋友鄉黨敬之。雖鬼神亦陰相之。爲惡之人。非獨其宗族親



戚叛之。朋友鄉黨怨之。雖鬼神亦陰殛之。故積善之家。必有餘慶。積不善之家。必有餘殃。

見人之爲善。我必愛之。我能爲善。人豈有不愛我者乎。見人之爲不善。我必惡之。我苟爲不善。人豈有不惡我者乎。故凶人之爲不善。至於隕身亡家而不悟者。由其不能自反也。

今人不忍一言之忿。或爭銖兩之利。遂相構訟。夫我欲求勝於彼。則彼亦欲求勝於我。讐讐相



報。遂至破家蕩產。禍貽子孫。豈若含忍退讓。使鄉里稱爲善人長者。子孫亦蒙其庇乎。

今人爲子孫計。或至謀人之業。奪人之產。日夜營營。無所不至。昔人謂爲子孫作馬牛。然身沒未寒。而業已屬之他人。讐家羣起而報復。子孫反受其殃。是殆爲子孫作蛇蝎也。吁。可戒哉。

陽明先生三箴

嗚呼小子。曾不知警。堯詎未聖。猶日兢兢。旣墜



于淵。猶恬履薄。旣折爾股。猶邁奔蹶。人之冥頑。則疇與汝。不見壅腫。砭迺斯愈。不見痿痺。劑迺斯起。人之毀詬。皆汝砭劑。汝曾不知。反以爲怒。匪怒伊色。亦反其語。汝之冥頑。則疇之比。嗚呼小子。告爾不一。旣四十有五。而曾是不憶。

嗚呼小子。慎爾出話。燥言維多。吉言維寡。多言何益。徒以取禍。德默而成。仁者言訥。孰默而譏。孰訥而病。譽人之善。過情猶耻。言人之非。罪曷



有已。嗚呼多言。亦惟汝心。汝心而存。將日欽欽。  
豈遑多言。上帝汝臨。

嗚呼小子。辭章之習。爾工何爲。不以釣譽。不以  
蠱愚。佻彼優伶。爾視孔醜。覆蹈其術。爾顏不厚。  
日月踰邁。爾胡不恤。棄爾天命。昵爾讐賊。昔皇  
多士。亦胥茲溺。爾獨不鑒。自抵伊亟。


陽明先生客座私祝

但願溫恭直諒之友。來此講學論道。示以孝友。



謙和之行。德業相勸。過失相規。以教訓我子弟。  
使無陷於非僻。不願狂燥惰慢之徒。來此博奕。  
飲酒。長傲飾非。導以驕奢淫蕩之事。誘以貪財。  
黷貨之謀。冥頑無耻。扇惑鼓動。以益我子弟之。  
不肖。嗚呼。由前之說。是謂良士。由后之說。是謂。  
凶人。我子弟若遠良士。而近凶人。是謂逆子。戒。  
之。戒之。







遂得之行德。然則通人。何足以教訓我子弟。  
使無陷於非僻。不類。仁。保。爾。後。之。往。來。此。神。之。  
飲。酒。長。傲。飾。非。導。以。矯。善。淫。蕩。之。事。防。以。食。財。  
賄。貨。之。器。冥。頑。無。恥。腐。惡。鼓。動。以。益。我。子。弟。之。  
不。肖。焉。呼。由。前。之。說。是。謂。良。士。由。后。之。說。是。謂。  
凶。人。我。子。弟。若。遇。良。士。而。近。凶。人。是。謂。避。子。而。  
之。放。之。



